

# 「疫境有情」故事 / 廣播劇創作比賽 2021

主辦：戲劇教育發展基金 及 香港教師戲劇會

協辦：香港創意教育工作者協會

過去一年，新型冠狀病毒疫情反覆不定，香港市民同心抗疫，處處可見人間有情。有見及此，本會舉辦《「疫境有情」故事／廣播劇創作比賽 2021》，誠邀中、小學生創作故事或廣播劇，以記錄香港的時代回憶和疫情下的動人情節。盼望教師鼓勵學生參與是項能激發學生創意潛能，且饒有意義的活動。

## 中學組冠軍

學校：何文田官立中學

學生：陳凱嫻 余佩均 鄔曉楠 葉海琪 楊芷淇 陳寶盈

劇目：「疫」情有你

## 劇本全文

### 第一場（嘉怡一家人晚飯）

1. 嘉怡：（大叫）家姐，食……係喎，家姐整親隻腳，仲喺醫院喎。（聲音漸細，不太開心。）  
（嘉怡行至飯枱的腳步聲／電視新聞音樂。）
2. 報道員：歡迎收睇無線七點半一小時新聞，我係劉欣欣。今日主要新聞有，中國發佈一則緊急通知，喺中國武漢發現新型冠狀病毒，感染人數持續上升。詳細內容：今日下午四點鐘，中央政府發佈一則緊急通知，喺中國武漢，發現新型冠狀病毒，原因尚未查出，但感染人數持續上升，香港政府提醒市民，要注意防範，時刻保持個人衛生，避免病毒係香港散播。（新聞聲音漸細。）
3. 爸爸：妹妹，聽唔聽到新聞講乜嘢啊，返學記住要注意個人衛生，唔好成日唔洗手就食嘢，小心食晒啲菌入肚，搞到自己病咗啊。最近疫情啱啱爆發，又正值流感高峰期，醫院越嚟越忙，到時候我要留係醫院當值就有得「哦」你㗎啦。
4. 嘉怡：知啦，我又唔係細路仔，我暑假之後就升中一啦。（不耐煩）
5. 媽媽：你啱啱洗咗手未啊？
6. 嘉怡：知道啦，我而家咪去咯。

(去廁所腳步聲／洗手聲。)

7. 旁白：喺嘉怡洗緊手嘅時候，病毒軍團又有另一啲諗法。
8. 病毒隊長：明明爭啲就可以入侵佢嘅身體㗎啦，佢點可以咁聽話㗎，跣啲嘅話，我哋已經成功㗎啦。(黐)
9. 病毒兵：(擦鞋仔嘅語氣)係咯係咯，爭啲就成功㗎啦。
10. 隊長：而家咁嘅樣，呢家人我地都係無辦法㗎啦，收兵，撤退翻軍營。
11. 病毒兵：Yes, sir! (全部病毒一齊嗌)  
(閃水喉聲／行翻出飯廳腳步聲／坐低嘅聲)
12. 嘉怡：我洗完啦。
13. 爸爸：洗乾淨噏就乖啦。好啦，開飯。
14. 嘉怡：爹哋食飯，媽咪食飯，家……唉，家姐仲喺醫院，我好掛住佢啊。
15. 媽媽：反正聽日星期六，聽日就早啲起身，跟爸爸去醫院探家姐啦。
16. 嘉怡：(開心)好嘢！

## 第二場

17. 旁白：第二日八點，媽媽同埋妹妹跟住爸爸去到醫院探嘉欣。  
(走路聲／扣門聲／開門聲)
18. 嘉欣：哇，爹哋媽咪，你地嚟喇！嘉怡，你又嚟㗎啊！(開心)
19. 媽媽：係啊，妹妹話好掛住你，咁啱佢今日又唔洗返學，咪帶埋佢黎探你咯。
20. 嘉怡：係啊家姐，我好掛住你啊，你好翻啲未啊？
21. 嘉欣：我就話我好翻啦，爹哋咯，硬係話我未出得院。
22. 爹哋：欣欣，骨折可大可少啊，如果你唔等隻腳好翻先翻屋企，留底後遺症就慘啦。
23. 旁白：喺嘉欣一家人傾得如火如荼嘅時候，病毒軍團已經趕到醫院，準備惡搞一番。
24. 病毒隊長：哈哈，醫院入面咁多人，我就唔信一個都入侵唔到。副隊長，你帶住你哋兵行右邊，我地分頭行動。
25. 副隊長：好！我個隊嘅跟我黎，速戰速決。
26. 旁白：等副隊長走咗之後，隊長偷偷地派咗一個病毒兵去監視副隊長，原來副隊長嘅內心並唔想入侵人類，一心只想世界和平，佢認為現有嘅，已經令佢好滿意。另一邊，媽媽同嘉怡準備要返屋企。
27. 媽媽：嘉欣，我同妹妹走先啦，記住要好好休息，唔好周圍走啊。
28. 嘉欣：吓？咁快就走啦，噏我咪要自己一個人獨自面對孤獨咯。(扮喊)
29. 嘉怡：家姐，唔好扮嘢啦，快啲好返，咪可以返屋企咯。(無奈)
30. 嘉欣：好啦好啦，噏你地走啦，就等我自己一個人，係度拯救世界啦。(扮曬嘢)

31. 旁白：嘉欣諗唔到嘅係，佢竟然用佢自己少少嘅力量就幫咗唔少人。而爸爸喺媽媽同妹妹走咗之後，就返返自己嘅崗位度當值。

（轉場聲）

32. 護士：哎呀，陳伯啊，你仲未好返架，唔好走嚟走去啦，等陣跌親點算啊。

33. 陳伯：你唔好理我啦，我去個廁所啫，死唔去嘅。

34. 護士：噉你自己一個人小心啲啊，而家啲病毒咁犀利。（伯伯行路聲開始時講）記住要洗手啊！（大叫）

35. 陳伯：（內心）嘩，大菌食細菌，我都七十歲啦，乜嘢菌未見過，仲使你個護士仔嚟教我做嘢咩，阿伯做嘢唔使你教，我食鹽多過你食米，我就唔洗，睇你可以點。

36. 旁白：老頑固最終都係無洗手就出咗嚟，然而，病毒軍團喺陳伯同護士講緊嘢嘅時候，已經喺伯伯必經之路等緊伯伯自投羅網。

37. 隊長：唔洗手？太好喇。哈哈，我哋終於可以成功啦。

38. 病毒兵：好嘢，終於可以成功啦。（擦鞋仔嘅語氣）

39. 旁白：隊長帶住佢嘅病毒兵跳上伯伯隻手度，喺伯伯食飯嘅時候，通過佢嘅口鼻進入伯伯嘅身體。同日夜晚，伯伯持續高燒不退，經過爸爸陸慕華醫生嘅研究同診斷，確認伯伯對新冠病毒嘅化驗呈陽性，確診新冠肺炎。通報醫管局後，醫院緊急封鎖，所有人員不得進出。

### 第三場

40. 廣播：緊急通知，由於院內發現傳染性病毒，醫院將即時緊急封鎖，所有人員不得進出，請安保人員及醫務人員作出相應措施，請各位市民做好預防措施，配合醫務人員工作，多謝合作。緊急通知，由於院內發現傳染性病毒，醫院將即時緊急封鎖，所有人員不得進出，請各位市民，做好預防措施，配合醫務人員工作，多謝合作。（醫院廣播聲）

41. 旁白：陸慕華作為伯伯嘅主診醫生，需要向院方高層提交一份醫療報告，解釋伯伯確診嘅原因，爸爸百思不得其解，只好去問伯伯嘅護士，發生咗乜嘢事。

42. 爸爸：我真係諗唔明，明明醫院已經做好曬預防措施又定時消毒同清潔架啦，點解伯伯仲會確診？無理由架.....黃姑娘，你知唔知伯伯究竟做咗啲乜嘢啊？

43. 護士：伯伯平時做咩都有護士陪佢，除咗去廁所.....（越黎越細聲／思考）啊！廁所，係廁所（激動）。一定係伯伯唔注意個人衛生，去完廁所又唔洗手。

44. 旁白：係醫護人員安撫緊其他病人嘅情緒同埋進行緊檢測工作嘅時候，嘉欣化身為醫院嘅小小英雄，佢去到急症室提醒各位市民戴口罩，又去兒科安撫小朋友嘅情緒。

（轉場聲）

45. 嘉欣：伯伯，醫院已經緊急封鎖咗，我送個口罩俾你，記得要一直戴住唔好除啊。
46. 伯伯：好，知道啦，唔該曬你啊小妹妹。
47. 印度人：Excuse me，我唔係好 understand 講咗啲咩，can you help me？
48. 嘉欣：Of course, here's a mask, as there's some emergency situation in the hospital, please put on the mask and wait for the nurse's instructions patiently please。
- （轉場聲）
49. 嘉欣：小朋友，我同你地玩個遊戲，我哋一齊戴住個口罩，邊個除咗落黎先就輸，贏個個可以有一份大禮物好唔好？
50. 小朋友們：好！
51. 旁白：經過一晚高强度工作之後，醫院暫時確定除咗陳伯之外，無其他人感染，醫院即時解除封鎖，並提醒各位市民要高度防範新冠病毒。爸爸亦代表醫院向記者交代事件。
- （轉場聲／相機聲）
52. 記者：陸醫生，請問點解會有確診事件發生？係咪醫院嘅預防措施做得唔夠？定係係醫務人員嘅疏忽呢？
53. 爸爸：首先，化驗結果顯示除咗陳伯以外，醫院內並無其他人感染，足以說明醫院嘅預防措施做得十分足夠，病人確診嘅原因，係因為佢唔注意個人衛生，先會令病毒有機可乘。我代表醫院提醒各位市民要注意防範，雖然醫院嘅病毒已經得到控制，但係難免會有病毒喺社區傳播，所以請各位市民保持個人衛生，避免病毒係社區散播，多謝大家。
54. 旁白：病毒得到控制，但係病毒軍團隊長同埋副隊長趁機偷偷走咗出嚟，返到病毒國之後佢地去見國王。
- （轉場聲）
55. 隊長：國王，對唔住，我地失敗咗。
56. 國王：廢柴，一堆廢柴，去咗咁多日都淨係入侵咗一個人類，仲要俾人類控制住，簡直係丟我地病毒國嘅假，嚟人，清除佢地。
57. 病毒兵：係！
58. 旁白：雖然嘉欣未能根本解決病毒問題，但係疫情下，全靠呢啲無名英雄，社區嘅病毒先得以控制，因此我哋要學識感恩，亦唔好為社區添麻煩，無論有冇疫情，都要時刻保持個人衛生，為自己、為屋企人、亦為香港著想。
- （完）

